



巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察

院右僉都御史臣于成龍 謹

題爲藐法賄賂大弊事該

臣

看得安四兒等偷竊

昌平州海承錫等家驢馬頭畜迨拿獲各盜內
有窩犯季大係旗下庄頭持銀七兩七錢令伊
弟季三轉央告頂生員潘伊在向吏目行賄求
釋當經吏目石岱據實出首將盜犯賄銀一併



呈解經巡道僉事胡獻徵審供明確除竊盜並
行賄各犯遵照律例分別解部發落外臣思
君恩甚重臣節維艱凡有司方面且有不能以廉潔
自持者石岱係微員雜職不受賄賂此乃恪遵
功令應與鼓勵之員臣不敢因石岱係微員而泯
沒不以

上聞也臣謹具

題伏乞

勅部議覆施行臣未敢擅便謹

題請

旨康熙二十五年十二月十八日題二十六年正月

日奉

旨石岱舉首行賄可嘉着議奏該部知道該臣等議
得直隸巡撫于成龍疏稱安四兒等偷竊昌平
州海承錫等家驢馬頭畜迨拿獲各盜內有窩
盜犯季大持銀七兩七錢令伊弟季三轉央告

頂生員潘伊任向吏目行賄求釋當經吏目石岱據實出首將盜犯賄銀一併呈解石岱係微員雜職不受賄賂此乃恪遵

功令應與鼓勵之員等因前來查昌平州吏目石岱將行賄銀兩出首應照例於現任內加一級等因康熙二十六年二月十五日奉

旨依議

巡撫直隸等處地方管轄紫荆等關宣府一鎮地方密雲等關隘贊理軍務兼理糧餉都察院右僉都御史臣于成龍 謹

題爲請除積弊便商足課事康熙二十五年十二月二十一日准戶部咨貴州清吏司案呈奉本部發戶科抄出該本部覆天津關監督巢可托題前事等因康熙二十五年十一月二十日題本月二十八日奉

旨該部議奏欽此欽遵於本月二十九日抄出到部
該臣等查得天津關監督巢可托疏稱天津關
正項稅銀三萬六千餘兩之外另有落地稅銀
四千餘兩凡貨物到天津發賣者照例令納落
地稅銀及運往京通等處販賣亦復照例徵收
正項稅銀則例內正項稅銀少重落地稅銀畧
輕是以地棍奸商將應納正稅貨物暫卸行店
止納落地稅銀而後私運他處販賣將應納正

項稅銀入已及收其正稅反指重徵又泊頭連
兒窩趙北口等處爲水路到津之要路一切進
京貨物皆其必由之徑隨有本地之土棍豪惡結
連黨羽分佈要地仍立店家哄誘客商將貨物
以爲起裝車駝可以遶道避稅因而抽分腳價
牙用或誘遠商將來津貨物設法阻撓應輸稅
課暗自入已或奸商結連此輩將南來貨物由
陸路起運京通等處西北貨物亦至此等處所

往南是以商船漸至稀少今若不亟行查禁斯
弊日熾有虧課額請將落地稅銀停其徵收將
此四千餘兩落地稅額增入正稅之內則奸商
地棍無所施侵蝕之巧而原額庶可無虧其趙
北口泊頭連兒窩等處實係津關肘腋請於趙
北口泊頭連兒窩等處設人稽查至商人願就
彼處陸運者卽在彼處徵收給單照驗等因前
來查該監督旣稱地棍奸商將應納正稅貨物

暫卸行店止納落地稅銀將應納正項稅銀入
已請將此四千餘兩落地稅額增入正稅之內
而奸商地棍無所施侵蝕之巧等語應如該監
督所題仍將落地稅作爲正稅項款造入冊
內送部查核至泊頭連兒窩趙北口等處該監
督旣稱爲水路到津之要路土棍豪惡將貨物
起裝車駝遶道因而抽分脚價請設人稽查其
商人願就彼處陸運者卽在彼處徵收等語相

應移咨該撫查明泊頭連兒窩趙北口等處如
果有土棍將貨物起裝車駝遶道者該撫一面
題報一面着該監督設人稽查收稅如土棍奸
商抗不遵依者該監督會同巡撫指名題叅從
重治罪可也等因康熙二十五年十二月十一
日題本月十四日奉

旨這本內事情應否可行着該撫會同巢可托確議
具奏欽此欽遵抄部發司奉此案呈到部移咨到

臣准此隨移會該監督并檄行直隸守道轉行
河間府傳集各該地方官赴保公同確議去後
據直隸守道叅議朱弘祚呈稱前來該臣看得

天津關徵收權稅從前弊端不一臣到任之後

嚴行體訪并移會監督禁戢家人關役人等不
得借端留難需索商賈而關役人等亦少知斂
戢第徵收則例存在該關臣無從稽核今部覆
新任監督臣巢可托疏稱地棍奸商將應納正

稅貨物暫卸行店納落地稅銀將應納正項稅
銀入已請將此四千餘兩落地額稅增入正稅
之內而奸商地棍無所施侵蝕之巧等語應如
監督所

題仍將落地稅銀作為正稅項欸造入冊內送部
查核等因奉

旨應否可行令臣會同監督確議具奏臣遵卽移會
監督臣巢可托并檄行守道叅議朱弘祚傳集

各該地方官到保會議得落地稅與正稅科賦
輕重不同恐奸商投輕避重應將落地稅額增
入正額之內聽其轉販誠屬可行應如部覆至
於鄉民日用衣食之需尺布斗粟零星等物稅
銀一概免其徵收其稅課局大使原係為落地
稅設立今既將落地稅停其徵收該局大使實
屬冗員相應裁缺給文赴部候補再查泊頭連
兒窩距津三百餘里凡南來貨物已歷淮揚臨

清諸關其發往

畿南各州縣者固不能強之使北且權關之制過關而後有稅斷無不過關而遙令納稅之理也至於趙北口在天津之西三百餘里非南來大河又非水路通津要道西北貨物往南既不經由津關似屬無涉況關稅既無缺額無故於此三處設立巡攔稽查必滋胥役乘機擾民之弊仍應遵照舊制無容設人稽查以仰副我

皇上軫恤商民之至意也

臣

謹會同天津關監督臣

巢可托合詞具

題伏乞

睿鑒施行康熙二十六年正月二十日題二月初四日奉

旨該部知道該戶部臣等會議得先經天津關監督巢可托疏稱天津關正項稅銀之外另有落地稅銀四千餘兩請將落地稅銀增入正稅之內

泊頭等處設人稽查等因戶部將落地稅銀准其增入正稅之內其泊頭等處設人稽查之處行令該撫查明等因具題奉

旨這本內事情應否可行着該撫會同巢可托確議具奏欽此欽遵行文去後今據直撫于成龍疏稱落地稅與正稅科則輕重不同恐奸商投輕避重應將落地稅額增入正額之內聽其轉販其泊頭連兒窩距津三百餘里凡南來貨物發往

畿南各州縣者固不能強之使北且權關之制過關而後有稅斷無不過關而遙令納稅之理至於趙北口在天津之西三百餘里非水路通津要道況關稅既無缺額無故於此三處設立巡攔稽查必滋胥役乘機擾民之弊仍應遵照舊制無庸設人稽查等因會同監督巢可托具題前來查落地稅增入正稅之處該撫既稱科則輕重不同恐奸商投輕避重應將落地稅額

增入正額之內等語應如該撫所題仍將此項
稅銀另造清冊送部查核其泊頭等處該撫既
稱距津三百餘里且權關之制過關而後有稅
斷無不過關而遙令納稅之理無故於此三處
設人稽查必滋胥役乘機擾民之弊等語應無
庸議又疏稱稅課局大使原係爲落地銀設立
今既將落地稅停其徵收該局大使實屬冗員
相應裁缺給文赴部候補等語相應將該局大

使裁去給文赴部候補可也等因康熙二十六年
二月十四日題本月十六日奉

旨依議

巡撫直隸等處地方管轄紫荊管關宣府一鎮
地方密雲等關隘贊理軍務兼理糧餉都察

院右僉都御史臣于成龍 謹

題爲註誤雖經已定權例實有可矜籲懇

題復以全蟻職事該_臣看得原任大城縣知縣朱

好義先因劉氏狀告何三等打死伊夫葉如松
一案好義未經通詳止斷給燒埋結案及劉氏
奔控前撫臣崔澄批發巡道查審又將要犯不

解以致懸案難結據該道將好義怠玩職名開
揭報臣具疏

題叅部覆照人命隱匿不報上司例革職迨後拘
齊案內人犯歷審葉如松實係被毆自縊身死
經臣將邵五虎邵六虎何三等照用強毆打威
逼人致死律分別軍徒杖罪援

赦具

題部覆免罪奉

旨欽遵在案今朱好義以緣事之罪犯既沐
皇仁其誑誤之間官懇邀

恩宥呈請具

題復職臣復批行巡道僉事胡獻徵查議去後據

該道詳稱威逼自盡之案原非真正人命可比
卽其解犯遲延處分亦別有定例止因報叅怠
玩在未經審明威逼之前故部議照不報真正
人命之例處分今罪犯均邀

赦典而好義獨罹革職情實可憫等情查處分官員
部臣自有一定之例臣亦何敢代爲冒瀆

宸聰但案內正犯邵五虎等業經援

赦免罪而承問之朱好義獨罹革職之譴揆之情理
似屬可矜應否

勅部查議復其原職照臣原叅怠玩遲延之例處分

俾好義得與邵五虎等同邀

浩蕩之恩自在

皇上一視之仁非臣所敢擅請也既據呈詳前來理

合具

題伏乞

睿鑒施行康熙二十六年二月初三日題本月十三

日奉

旨該部議奏該吏部議得直隸巡撫于成龍疏稱原
任大城縣知縣朱好義先因狀告何三等打死
葉如松一案未經通詳將要犯不解經臣題叅

部覆照人命隱匿不報上司例革職後審葉如松實係被毆自縊身死經臣將邵五虎等罪援赦具題部覆免罪在案今朱好義呈請復職臣批行巡道查議據詳威逼自盡之案原非真正人命可比今罪犯均邀

赦典而好義獨罹革職情實可憫等情但案內正犯業經援

赦免罪而承問之朱好義獨罹革職情理似屬可矜

應否

勅部查議復其原職照臣原叅怠玩遲延之例處分俾好義得與邵五虎等同邀

浩蕩之恩自在

皇上一視之仁非臣所敢擅請也等因前來查大城縣知縣朱好義將劉氏所告伊夫葉如松命案竟不詳報止斷給燒埋結案因隱匿不報上司照例革職在案相應將該撫所題復還朱好義

原職之處毋庸議康熙二十六年二月二十九日奉

旨葉如松非被人打死先將朱好義卽以不報革職今既經審虛又議不准行是否相合着再確議具奏欽此再議得直隸巡撫于成龍題原任大城縣知縣朱好義復其原職一案臣部以毋庸議議覆奉

旨葉如松非被人打死先將朱好義卽以不報革職今既經審虛又議不准行是否相合着再確議具奏欽此查劉氏將伊夫葉如松命案控告原任大城知縣朱好義並不通詳上司隱匿私行和息斷給燒埋銀兩結案情由故議不行但該撫于成龍疏稱葉如松實係自縊身死邵五虎等罪業經援

赦免罪而承問之朱好義獨罹革職是屬可矜請復原職等語相應將朱好義復還原職可也等因

奉

旨依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲特叅貪劣捕官以肅吏治事竊惟州縣捕員
職雖微末與民最近俱當循分供事兢兢畏法
二 如有遷安縣典史徐元慎貪婪無忌穢跡彰著
今據直隸守道叅議朱弘祚直隸巡道僉事胡
獻徵通永道僉事宋榮永平府知府盧騰龍遷

安縣知縣李繼烈揭報本官劣蹟合之臣訪聞
無異此一官者職本么膺罔顧法紀藉查保甲
而罰錢指祝生辰而索餽擅立官尺違禁受詞
賍証有據物議沸騰誠難姑容以爲民累所當
特疏糾叅請

旨革職同有名蠹役提問究擬者也臣未敢擅便謹

題請

旨康熙二十六年二月初七日題本月十五日奉

旨這所叅徐元慎着革了職其貪劣各款併本內有
名蠹役該撫嚴提究擬具奏該部知道

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲縣令科派橫徵臣謹特疏糾叅以儆官邪以

甦民困事該臣看得邵嗣昌乃東安縣革職知

縣吳兆龍案內免死發遣尚陽堡安插之人犯

臣准部咨檄行巡道僉事胡獻徵追贓發遣嗣

據伊祖母毛氏向臣衙門告留終養批發東安

縣查明嗣昌實係毛氏過繼之孫此外並無以
次人丁乃有生員張淳等又以毛氏捏稱孤子
等情詞赴縣具控詳解巡道嚴行質審今據詳
稱毛氏實係嗣昌之祖邵豫新繼娶之妻因無
子息自幼過繼嗣昌爲孫其嗣昌從前雖有二
子長子早已承繼本生伯祖邵穎發爲後見有
該縣印照可據次子久經亡故質之族長隣佑
人等咸稱毛氏實係嗣昌之祖母除嗣昌之外

並無養贍之人應否照例准其存留養親聽候
部奪至張淳田霖曹鉞劉擎楊言扈翼升劉進
張元庚曹泓挾仇捏控擬杖折贖再查邵嗣昌
於追贓之際卽據毛氏以孤子具呈若不批准
行查恐與定例有悖而張淳等復以假捏孤子
控縣在該縣又不得不詳慎審解以定虛實原
非無故稽延相應一併

題明既據該道取有印甘各結呈詳前來除將原

結咨部外理合具

題伏乞

勅部議覆施行康熙二十六年三月初九日題十六日奉

旨該部議奏該刑部議得免死減等流犯邵嗣昌一案先經臣部等衙門以邵嗣昌說事過錢擬以流罪具題咨行去後今據直撫于成龍疏稱邵嗣昌祖母毛氏告留終養嗣昌雖有二子長子

早已承繼伯祖邵穎發爲後次子又經亡故除嗣昌之外並無養贍之人應否准其存留養親聽候部奪等因具題前來查定例內軍流徒犯祖父母父母老疾無以次成丁者准其存留養親等語邵嗣昌現有一子與存留養親之例不符相應仍行該撫將邵嗣昌僉妻速行解部發往尚陽堡安插邵嗣昌既照例發遣生員張淳等應毋庸議等因康熙二十六年三月二十七

日題二十九日奉

旨據該撫疏稱邵嗣昌長子早已承繼邵穎發爲後
次子又經亡故爾部議邵嗣昌現有一子與例不
符是否相合着再議具奏欽此覆議得免死減等
流犯邵嗣昌一案直隸巡撫于成龍題請邵嗣
昌應否存留養親等因前來臣部因邵嗣昌現
有一子與存留養親之例不符仍議發遣具題
奉

旨據該撫疏稱邵嗣昌長子早已承繼邵穎發爲後
次子又經亡故爾部議邵嗣昌現有一子與例不
符是否相合着再議具奏欽此查邵嗣昌現有一
子應不准存留養親但該撫疏稱嗣昌之子招
弟承繼本生伯祖邵穎發爲後除嗣昌之外並
無養贍毛氏之人等語應將邵嗣昌停其發遣
枷號兩個月責四十板准其存留養親餘照前
議等因康熙二十六年四月十一日題十三日

奉

旨依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲打死人命事該_臣看得曹氏乃村農曹化白
之孫女也康熙二十五年九月二十日有隣人
李根景見化白舉家採花往地曹氏隻身在家
踰牆入院強逼求姦氏乃誓死堅拒不從裂衣
聲喊根景因姦未遂恐事敗露頓生殺機以圖

滅口先以鞭杆擊倒復拾磚狠毆以致曹氏受傷
傷深重次日殞命根景行克脫逃之際被隣人
李鉉窺見首縣拘審李根景直認不諱應按律
擬斬以慰貞魂乃未正典刑而先服冥誅毋庸
置議至於曹氏以村庄弱女能視死如歸而不
爲強暴所污貞烈之操誠爲希覲相應

題請旌表以振勵風化者也伏乞

勅部議覆施行康熙二十六年三月二十二日題四

月初二日奉

旨該部議奏該禮部議得直隸巡撫于成龍疏稱曹
氏乃村農曹化白孫女康熙二十五年九月二
十日有隣人李根景見化白舉家採花往地踰
牆入院強逼求姦氏堅拒不從根景以鞭杆擊
倒復拾磚狠毆曹氏受傷深重次日殞命相應
題請

旌表以振勵風化等因前來查康熙十九年八月內

刑部等衙門會議吳近亭欲姦焦氏與女三姐
不從吳近亭情急用小刀亂扎母女中傷殞命

臣部題明

旌表在案今曹氏因李根景強姦不從被根景毆死
與焦氏三姐之例相符應請

勅下該撫照例轉行該地方官給曹氏銀三十兩聽
本家自行建坊可也等因康熙二十六年四
月初十日題本月十二日奉

旨依議

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲悖

旨橫索蠹

國殃民事該 臣 看得山海一關爲兩

京咽喉居民稠雜地瘠糧少向賴關外糧米流通
羣黎得以資生樂業茲據直隸守道叅議朱弘

祚巡道僉事胡獻徵護理通永道印務永平府知府盧騰龍等詳稱武舉郭振狀內所告把關章京藉奉天將軍禁止奸徒興販之文遂勾連披甲人等虎踞關隘將一切小民自種糧車橫行攔截百般勒索等因臣查奉天將軍禁止興販本爲關外添設駐防戶口加增起見凡有奸徒違禁興販該把關章京自應盤詰若關內土著之民或係關外自種之米或係自買升斗糊口之米並非興販可比廼守關官兵奉行不善概爲攔阻恣意勒索然後放行實屬民累旣據該道府詳報前來理合

題叅伏乞

勅部察議施行康熙二十六年五月初七日題本月

日奉

旨該部嚴察議奏該兵部等衙門題爲請

旨事武選清吏司案呈該本部摺子

題前事據查奉天將軍宗室察尼等咨稱據署理
山海關城守尉事佐領布克壽呈稱關上該班
驍騎校阿爾法等稟稱關外有一民人拉米一
車強要進關我等將禁止販米情由說與他不
聽反說你這衙門管我不着是耍猴兒的衙門
如此無禮來稟我等奉奉天將軍戶部府尹公
同禁止爾自當遵行奈郭振自恃武舉脫衣赤
身

盛京將軍戶部府尹亦管我不着恃強不法呈報
前來看得郭振來禁地販買糧米反辱罵把關
官長大爲不合但禁止興販事屬緊要祈部查
議等因前來續據直撫于成龍疏稱據武舉郭
振狀稱奉天將軍禁止奸徒興販之文把關章
京借此勾連披甲人等將小民自種糧車橫行
攔截每車詐錢五六千不等方許進關每日進
車百餘輛詐錢數餘萬官兵分肥等語看得奉

天將軍禁止興販原爲關外添設戶口加增起見凡有奸徒違禁興販該把關章京自行盤詰若關內土著之民或係關外自種之米或係升斗糊口之米並非興販可比廼守關官兵奉行不善概爲攔阻恣意勒詐然後放行實屬民累等因具題前來查得先據將軍察尼稱武舉郭振在禁地興販糧米進關攔阻時辱罵把關官長等語後據直撫于成龍將把關官兵概爲攔

阻任意勒詐等因具題若不對口審明難以遽議請

勅盛京刑部侍郎阿里虎親身赴山海關將本內有名人犯逐一審明具題到日再議可也等因康熙二十六年六月初四日題本日奉

旨依議該撫差官一員會審具奏

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲特叅貪汚州牧以甦民困以肅官常事竊照
順永保河四府屬康熙二十五年未完錢糧并
直隸各屬二十六年地丁各項錢糧荷蒙

皇恩概行蠲免正與小民休息之時所屬有司各官
咸宜奉公守法潔已愛民以仰副

皇上惠養元元至意臣申嚴告誡不啻至再至三乃
有愍不畏法如河間府景州知州惲驩者利慾
薰心貪婪敗檢穢跡昭著民怨沸騰今據直隸
守道叅議朱弘祚巡道僉事胡獻徵天津道僉
事石天樞河間府知府程汲揭報劣款合之臣
訪聞無異此一官者或指查廟會濠牆而橫索
多金或藉稱修理城垣而任意私派以及人命
盜賊私馬等項無不事事誅求得錢開釋官役

分肥士民含怨所當特疏糾叅請

旨革職與有名蠹役一併提問究擬者也臣未敢擅

便謹

題請

旨康熙二十六年五月初九日題本月二十二日奉
旨這所叅惲驩着革了職其貪婪各款併本內有名
蠹役該撫嚴提究擬具奏該部知道

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹
奏爲遵

諭密

奏事康熙二十六年四月二十一日侍衛臣吳達

禪奉

欽差過保口傳

皇上因春夏以來天旱不雨

輦轂之下盜警頻聞恐民生之未得安居致

宵旰之時厯

睿慮

密諭臣將弭盜安民實策詳悉敷陳顧臣迂庸奉職

無狀凡直隸之尺地寸土以及滿漢軍民臣忝

爲巡撫之官受封疆之寄不能周詳區畫仰體

聖心而至使

京城重地疎防徃徃見告上煩

宸念下累臣工溺職如斯措躬無地乃蒙

皇上不加譴責節取微長欽頌

上諭特加宮保

天恩高厚一至於斯臣自今以往之年計惟有鞠躬

盡瘁以報

朝廷職所當盡者不止安民弭盜之一端而目下之所最重而最不可緩者則誠以弭盜安民爲先

務_臣蓋淡思乎端本澄源之道而後知在外交
武之責成宜分也燕山六衛之職掌宜更也近
京捕盜之同知宜添設而

京城內外之保甲宜均編也且家僕爲盜之本主
罪當連坐縱容披甲之將領咎有攸歸而以竊
報強以少報多以無報有之失主處分不可以
不嚴也何以言其然耶文所轄者地方武所司
者防禦職固同也乃今日之盜持刀兵而挾弓

矢之旗丁爲多夫旗屯與文武均屬一體而失
盜叅罰及於文武者至於降革屯撥什庫不行
嚴查者止鞭五十似乎輕重不均_臣請嗣後遇

有地方失事者民村責之有司道路責之營汛
軍衛責之衛弁屯庄責之旗下該管各員照地
方官一例處分職任旣專防維自切推諉絕而
盜自寡巡防衆而賊漸消加以_臣又不時將標
下弁兵或二十員名或三十員名分路游巡聞

聲擒捕豈尚有揆丸肱篋愍不畏死者哉所謂
在外文武之責成宜分者此也

朝廷設官分職各有攸司倘其尸位素餐是謂曠官
溺職查燕山六衛衛官其所司之事分隸各部
臣不得而與知至其分管地方則或有遠至數
十百里者與州縣所屬道路村庄犬牙相錯不
相統屬椎埋剽竊之奸以其不管疎防易於托
足狡兔三窟穴處其間肆無忌憚而該衛各官

亦以從來

京衛地方失事止責汎弁認緝而該員劄無處分
漠不關心秦越相視此盜賊所以充斥而法令
所以不行也嗣後請將該衛所屬地方近州者
歸州近縣者歸縣近屯衛者歸屯衛而燕山六
衛之官不與焉則牌甲易編匪類易查積弊盡
除而有司得以無掣肘之慮矣所謂燕山六衛
之職掌宜更者此也查近

京一帶地方東則通州西則蘆溝橋南則黃村北則沙河皆環拱

神京爲往來通衢大道而馬賊強竊失事頻聞者總因各地方寥曠綿邈州縣有司刑名錢穀簿書期會之繁交錯應酬不能兼顧巡防緝捕之責佐貳官卑才薄又不足以彈壓而稽查之所致也

臣請

皇上睿斷於保定永平河間三府屬特設才能捕盜

同知四員分駐通州蘆溝橋黃村沙河四處將各附近地方一切強竊等盜賊案件專委任之此添設之官須揀選有不畏豪強不避勞苦兼善弓馬者不拘資格於各府屬官員中照通州知州例揀選保

題三年之內如果盜息民安勤勞稱職者則優加議叙倘仍盜賊橫行消弭無術者則嚴加處分立勸懲以爲標準而又兼使自守備以下之分

訊各官一切游巡墩臺諸務及旗下屯庄之保甲悉委其稽查則武弁有所顧忌而旗人亦受約束矣所謂近

京捕盜之同知宜添設者此也夫保甲之法仰奉俞旨令旗民一例均編法誠善也但行於民間者自覺其易而行於旗下者終覺其難則以其強梗有素一旦乍就羈勒飛揚跋扈之性終有所不安於中州縣有司思所以撫循而約束之誠非

易事故必議委捕盜同知以兼轄之也若夫

京師爲首善之區平日稽查之官瞻徇情面從無實力奉行者今請將前門等門內外所住官宦商民無分滿漢照外郡格式編立保甲其大街一帶於各衙街口盡立柵欄外多放守堆巡捕營官兵內多設八旗守堆官兵令其絡繹巡緝而衙衙以內之小街狹巷無不立柵關閉卽令柵內居住之十家牌長不論官民之家每牌多

撥更夫鳴鑼擊柝徹夜巡查倘或遇有兇徒可
以合力救護若仍虛應故事怠惰偷安以致失
事者大街則唯以守堆官兵是問衢術則俱責
成於本夜司更之甲長如此則奸人苦於藏身
之無策亦當瓦解獸散而不敢如前恣肆矣所

謂

京城內外之保甲宜均編者此也然此保甲之編
爲外人而言也若夫王公之家未便一例均編

致褻大體其隨從護衛官屬若槩加稽察恐來
束濕之傷若竟不查詢慮成社鼠之患法行自
近所貴又有變通之術以濟之蓋滿洲漢軍之
家習俗相沿以人口多者爲勝或宦游奉差而
契買或奸民犯罪而投身到

京恒產無多本主不容坐食守分無能之人輒有
告假出外苦力經營以納月錢者其強梁躍冶
之徒酗酒賭嫖無所不至月錢不能交納計無

復之相率行劫騙主而作盜者固多主知而縱
容者不少直隸各府盜案夥賊元謀率有旗人
在內且有本主帶同家僕上盜者臣審鞫得實
現獲其人從前已定之爰書可按籍而稽也臣
請

皇上諭令該部令各該都統嚴飭各員并閑散人等
約束家人不許作盜每月朔望呈遞並無擅放
家人出外非爲結狀送該都統存查嗣後如有

事犯發覺不論伊主知情與否一概嚴加處分
以家僕之奸良定伊主之功過將見人自覺察
而鷹眼不患於不速化矣所謂家僕爲盜之本
主罪當連坐者此也若本管官之於卒伍則又
非家僕本主可比者蓋官名本管統轄由之凡
好勇疾貧之旗厮本管官皆能指目倘小撥什
庫肯時加勤察等而上之以至於該管各官法
令嚴明有犯不宥彼縱饑寒切身懼其不旋踵

而卽被本管之拿首也亦斷無不凜然知畏者
臣請

皇上諭令該部嗣後凡各旗官員披甲及閑散人等
仍不嚴加鈐束使有一人作盜者作何處分二
人三人作盜者作何處分其有經年無事且能
擒拿別屬作盜之旗人者作何賞賚如此信賞
必罰而猶患道不拾遺之風不能再見於今日
未之有也所謂縱容披甲之將領咎有攸歸者

此也至於失主以竊報強以少報多以無報有
之弊在外郡尤有不可言者而大端有二其一
旗下庄頭屢向州縣官說事求情遇有鬻鯁之
員不聽情面心懷怨恨偶逢竊去衣驢微物卽
浮開數目改稱大盜行劫未報地方官先報伊
主伊主徑行報部咨查報叅止圖釋恨快意而
有司之叅罰鼠竊之性命則概置不顧者其一
偶奉伊主差遣下屯公務或事畢回

京携有一二銀錢貨物自巳花費無存輒捏稱行至某處地方被賊刼奪訊之鄉保而鄉保不聞質之巡兵而巡兵莫見捕風捉影希圖卸罪者凡此諸弊俱由從前未有定例若輩得以任意行私

臣請

皇上諭令該部添定處分捏報失主之例庶彼知有畏懼而有司不至受无妄之灾平民不至受扳詐之害矣再查昌平等十四城舊俱設有駐防

滿洲防守防尉等官以資扞禦而弭盜賊宜乎地方寧謐萑苻絕跡居民得安枕之樂行道無鳴鏑之驚矣而正未能盡然也是地方不受駐防之益亦大彰明較著也

臣

愚以為除近邊之

山海關等關口以及滄州寶坻保定順義諸處地方衝要仍留駐防外其餘各城宜一概撤令歸旗以免紛擾者也宛大之郊多有看坟旗人窩藏游手好閒之匪類如遇平居無事則相與

呼盧飲酒作踐居民如遇有線賊晒知殷實大
戶可以行劫者卽勾引夥黨上盜分贓地方知
之而不敢言坟主縱之而不肯問環城一帶大
率皆然臣愚以爲嗣後宜嚴飭墳主揀選老成
守分家人住庄看守墳主仍不時親加稽察如
再有犯者本主作何治罪嚴定處分以剪窩圍
者也此外如投克止一戶在旗養有馬匹而彼
闔族多人俱借一戶投旗名色私養馬匹甚多

若經訪查輒以投克影射是投克人之不許私
養馬匹與旗民間人之不許挾帶弓箭鳥鎗行
路均當嚴禁去其爲盜之具而影射者無所容
其奸矣嚴禁披甲人等不許在城外過夜住宿
絕其爲盜之路而不肖者無所施其技矣此皆
弭盜安民之先務而端本澄源之要道也臣自
奉

命撫直以來每思一介孤踪蒙

皇上特達之知以至今職夙興夜寐圖報

隆恩踵頂捐糜曾何足惜顧其中或有臣職所不能

兼位所不敢越者

皇上神明自有洞鑒臣故不敢妄陳封事以沽亢直

之聲而使持文法以議其後者加臣以越俎之

愆也茲者仰奉

恩綸諭臣密

奏是臣慙直敢言之愚忠已在

皇上日月照臨之下臣感激

天恩罔識忌諱敬陳一得之愚謹爲條

奏如左是否可行伏候

皇上採擇緣係遵

諭密

奏事理字多逾格不敢另具貼黃伏乞

皇上睿鑒施行康熙二十六年五月十五日題六月

初五日奉

旨道本內事情九卿詹事科道會同確議具奏欽此
該臣等會議得直隸巡撫于成龍條奏疏稱燕
山等六衛所司地方與州縣所屬道路村庄犬
牙相錯失事止責汎弁認緝例無處分漠不關
心秦越相視盜賊所以克斥而法令所以不行
也嗣後該衛所屬地方近州者歸州近縣者歸
縣近屯衛者歸屯衛而六衛之官不與焉有司
得以無掣肘之慮矣等語查燕山等六衛地方

盜案發覺將該衛各官原無處分之例是以秦
越相視盜賊匪類於此棲止亦未可定相應將
燕山等六衛經管錢糧文武鄉會所管事宜仍
令照舊管理外其各衛所屬地方俱各歸附近
州縣屯衛令其查緝盜賊如有盜案發覺將歸
併之州縣屯衛官員照定例處分又疏稱京師
一帶地方寥曠綿邈請於保定永平河間三府
特設才能捕盜同知四員分住通州蘆溝橋黃

村沙河四處強竊等盜賊案件尚委任之此添設之官須揀選不畏豪強不避勞苦兼善弓馬者不拘資格保題三年之內如果盜息民安勤勞稱職者優加議叙倘仍盜賊橫行消弭無術者則嚴加處分立勸懲以爲標準而又兼使自守備以下之分汛各官一切遊巡墩臺諸務及旗下屯庄之保甲悉委稽查似與地方有益均如所題將此添設同知令該巡撫保題設立分

住通州等處查緝盜賊三年之內息盜安民稱職者議叙倘盜賊不能消弭照不稱職例處分又疏稱失主以竊報強以少報多以無報有旗下庄頭偶逢竊去衣驢微物且浮開數目改稱大盜行劫未報地方官先報伊主徑行報部咨查報叅其偶逢伊主差遣下屯事畢回京携有一二銀錢貨物自己花費無存輒捏稱行至某處地方被賊劫奪捕風捉影希圖卸罪等語查

凡被刦之人被刦之時躲避不暇焉能知賊確數被刦之後約畧呈報將獲賊審理時必將伊夥賊數目減供如將失主以爲謊稱多報處分則失主懼罪不報盜賊愈致滋蔓且先經九卿會議將失主所報盜數存案不爲確數以初獲強盜嚴審供出盜數乃爲真盜之數等語並無將失主所報之數作爲確數此處應無庸議倘旗人以竊爲強並無被刦謊稱被刦報部者行

文該撫審實將謊報之人鞭一百又疏稱投克止一戶在旗養有馬匹而闔族多人俱借一戶投旗名色私養馬匹甚多若經訪查輒以投克影射是投克之人不許私養馬匹與旗民間人之不許挾帶弓箭鳥鎗均應嚴禁絕其爲盜之具而影射者無所容其奸矣等語查定例內民人私養馬匹將馬入官馬主責四十板等語民人一戶投克旗下伊闔族借此養馬爲盜亦未

可定嗣後旗下居屯之人及庄頭等准其蓄養各該旗色印烙馬匹如無印烙馬匹者如被查拏或被傍人出首者將馬入官養馬之人鞭一百屯撥什庫不行查出者鞭五十報首者免罪再查旗民間人挾帶弓箭鳥鎗等軍器出城者係旗人令其該都統出具印咨係民令同鄉人出具保結兵部給與印票始令出城如將無印票私行放出者將放出該門官兵處分此處無

庸另議又疏稱嚴禁披甲人不許在城外過宿絕其爲盜之路等語查康熙二十年七月內議政王等會議漢軍文武有職掌無職掌官員其滿洲蒙古告老告病解任官員有情願在關廂居住者許其居住披甲當差之人不准在關廂居住等語恐有不肖披甲人等在城外過宿爲非亦未可定嗣後披甲人等無故在城外過宿者鞭八十又疏稱今日之盜旗丁爲多夫旗屯

撥什庫與文武均屬一體而失盜叅罰文武至於降革屯撥什庫止鞭五十似乎輕重不均嗣後遇有地方失事民村責之有司道路責之營弁軍衛責之衛弁屯庄責之旗下該管各員照地方官一例處分職任既專等語查文武官員協力防守地方巡查地方一有盜案發覺將文武官員俱行處分而盜賊仍多若令文武分任地方則事發以爲各有指定地方彼此推委不

相協助無益於地方且旗屯原無該管官員相應將此處毋庸另議至屯內之人爲盜者將屯撥什庫鞭五十屬輕嗣後如有屯內之人爲盜者將屯撥什庫鞭一百又疏稱京師前門等門內外所住官宦商民無分滿漢照外郡格式編立保甲其大街一帶於各衙街口盡立柵欄外多設守堆巡捕營官兵內多設八旗守堆官兵巡緝衙衙以內之小街無不立柵關閉卽令柵

內居住之十家牌長不論官民之家每牌多撥
更夫鳴鑼擊柝徹夜巡查遇有兇徒合力救護
若怠惰以致失事者大街則惟以守堆官兵是
問衙衙則俱責成於司更之甲長則奸人藏身
無策等語查城內街道俱設有柵欄官兵看守
且步軍統領總尉等不時巡查城外關廂內亦
設有柵欄巡捕營官兵防守巡邏而五城司坊
官員亦不時巡察若再編保甲有累孤身窮民

於地方無益應將此處無庸議又疏稱令各都
統嚴飭各員並閒散人等每月朔望呈遞並無
擅放家人出外非爲結狀送該都統存查嗣後
如有事犯發覺不論伊主知情與否一概嚴加
處分凡旗下官員并披甲閒散人等一人作盜
者作何處分二人三人作盜者作何處分其有
經年無事且能擒拏別屬作盜之旗人者作何
賞賚等語查定例內前鋒護軍披甲應役閒人

每一佐領下有公然行劫一二人者將佐領罰俸一個月驍騎校罰俸二個月小撥什庫鞭責五十如有三四人將佐領罰俸二個月驍騎校罰俸三個月小撥什庫責七十鞭五六人者將佐領罰俸六個月驍騎校革職小撥什庫鞭一百十人以上者將佐領降一級罰俸一年驍騎校仍革職小撥什庫鞭一百二十名以上者將佐領革去佐領職任驍騎革職鞭一百折贖小

撥什庫鞭一百革去撥什庫等語又定例內凡常人捕獲強盜竊盜論盜之數賞銀相應將此處均無庸議至於在京旗下官員並旗下之家下奴僕爲盜者雖定有本主如有官者照驍騎校例處分如白人照小撥什庫處分之例並無定有在屯奴僕爲盜將伊主處分之例嗣後如有在屯奴僕爲盜者將伊主照在京奴僕爲盜之例處分又疏稱昌平等十四城俱設有駐

防滿洲防守防尉等官以資扞禦而弭盜賊而
正未能盡然也是地方不受駐防之益亦大彰
明較著也除山海等關口滄州寶坻保定順義
諸處地方衝要仍留駐防外其餘各城宜一概
撤令歸旗宛大之郊多有看墳旗人窩藏匪類
宜嚴飭墳主揀選老成守分之人看守墳主仍
不時稽察如有犯者本主作何嚴定處分以剪
窩園等語查昌平等各城官兵原爲地方安設

且定有年終照已獲未獲賊數議叙議處之例
應將此處毋庸議至容留之人爲盜者將容留
之房主治罪容留賊窩商議者將容留商議之
房主併兩隣治罪之處已於德珠等條奏疏內
定議應將揀選老成人看墳之處亦無庸議其
御史德珠等條奏關外村庄設立村長關廂內
外外來無業之人有保人准其居住之處仍不
准行其容留居住之人爲盜將房主處分容留

夥賊商議之家兩隣處分巡捕三營交與督捕
嚴查裁汰老弱挑選強壯補數什物器械整理
齊備之處均照前議俟

命下之日將應行事件通行該部院衙門八旗包衣
佐領并該撫遵行可也康熙二十六年六月十
六日題本月二十日大學士明珠等轉傳

上諭奉

旨這本內事情着該部差司官一員會同巡撫于成

龍確議具奏欽此本月二十一日兵部將郎中囊

吉理額黑禮職名繕寫綠頭牌啟奏奉

旨新近盛京馳驛回來郎中溫保明白着派出前去
欽此於本月二十三日郎中溫保党愛恭請

諭旨傳奏使敦柱轉傳

上諭奉

旨此原係巡撫伊具題之事已經九卿會議今將作
何所議之處帶回亦着諸臣議覆與爾等無涉但

從中間如何有益之處令其多說毋得刪阻原疏
內有不明數款着伊核議明白帶來該臣等會議
得兵部郎中溫保等疏稱直隸巡撫于成龍議
得一燕山等六衛之錢糧爲數無多自宜連地
方歸之州縣屯衛庶衛民遵守得專而稽察自
嚴且錢糧外止有文武鄉會試所管事宜切思
文武場鄉會執事之員有宛大兩縣五城司坊
可以承值若謂兩縣五城事務繁多則宛大附

近諸縣與巡捕三營等官儘足可以調撥協辦
今若將該衛地方歸併州縣屯衛其六衛童生
應得進學名數仍照六衛學原額增入該州縣
屯衛學而人才無阻抑之虞矣況遇編查時丁
有實在之丁地無欺隱之地而從前諸弊無不
盡除似此冗員理當裁撤等語均應如該撫所
議將燕山等六衛官員裁去所有該衛地方一
應事宜俱歸併附近州縣屯衛將某衛歸併某

州縣屯衛之處該撫另造清冊具題其所裁六
衛官員俱令赴部候補一通行直隸各省除看
家弓箭鳥鎗不禁外凡有公務出外勢須挾持
弓箭鳥鎗防護者所在衙門務必發給印票開
明人數若干弓箭鳥鎗若干若在屯庄旗人不
便令其赴京討票令在本州縣取結給票註明
使經過地方文武各汛地官弁以及住宿店家
俱一一查驗明白方許放行其有印票模糊踪

跡詭秘者卽時密報協拿毋使兔脫正所謂去
其爲盜之具而影射者無所容其奸等語除奉
旨緊差人員不議外嗣後一應官員人等或因公差
遣或爲私事行走攜帶弓箭鳥鎗者若係部院
衙門及八旗官員人等因公差遣者兵部給發
印票爲私事行走者各該旗都統給發印票若
係內務府該管各衙門人員內務府給發印票
漢官員人等各該地方官給發印票若無印票

私自攜帶弓箭鳥鎗者係官罰俸六個月係白人鞭八十係民責三十板一旗屯原無該管官員之處止因從前立法未備而然若但將屯內之人爲盜者該屯撥什庫鞭一百而不將佐領驍騎校定其處分則彼等皆自視爲局外之人無有耑責而袖手旁觀不肯實心任事將該管之佐領驍騎校照在京所屬之人爲盜例處分庶彼皆凜然知畏而其相覺察等語查旗屯環

遶京師四五百里之內各處零星居住不便設立官員因佐領不能遙制每屯設有屯撥什庫若屯內之人爲盜處分撥什庫又家僕爲盜亦現議一定處分家主是以未定有處分佐領等之處原非立法不備且此縣之民至彼縣爲盜者亦不過止將失事地方官員處分並無處分本地方官之處今若因遠隔數百里屯人爲盜處分佐領驍騎校民人在他處爲盜處分本地

方官事屬繁冗將此處無庸議一申飭昌平等城兵丁兵民相安等語查各省駐防將軍城守尉令其安緝兵民毋擾百姓原有禁約之處且兵丁有擾民者俱定有處分之例此處應毋庸議一嗣後若有看墳之家僕或爲窩或爲盜者將墳主照依庄屯奴僕爲窩爲盜之例治罪自不敢不慎重查察等語查屯內居住家僕爲盜將伊主現議處分若看墳之人爲盜將伊主治

罪之處亦在此例之內應將此處毋庸議至添設捕盜同知以少報多以竊報強以無報有不許指稱投克旗人養馬不許披甲人等城外過宿文武職掌攸分京城內外編設保甲撤回昌平等城官兵等處該撫既與九卿所議無異仍照前議至御史德珠等條奏關外村庄設立村長關廂內外外來無業之人有保人准其居住之處仍不准行其容留居住之人爲盜將房主

處分容留賊夥商議之家兩隣處分巡捕三營
交與督捕嚴查裁汰老弱兵丁等處均照前議
俟

命下之日將應行事件通行該部院衙門八旗包衣
佐領并直隸各省遵行可也康熙二十六年七
月初四日題本月十三日奉

旨依議携帶弓箭等項着照現行例行

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲欽奉

上諭事竊 臣 欽惟我

皇上念畿輔爲首善之區重培邦本慮黎元鮮蓋藏
之術大沛

恩膏頃因順永保河差役倍多蠲豁兩年租賦茲聞

真順廣大編氓艱苦弘敷一視同仁更因宣府
地處邊隅將康熙二十六年錢糧並與蠲免臣
准部咨隨刊刻告示通行曉諭各屬仰荷

綸音歡聲雷動紳衿士庶咸稱

聖德無疆蔀屋窮簷共樂太平有象各瀝悃誠齊伸

叩

謝茲據守道叅議朱弘祚叙詳前來雖草野俚言從
無上達

宸聰之例但據詞禱祝實出下情感激之誠臣不敢
緘默謹恭疏

題報伏乞

睿鑒施行臣未敢擅便謹

題請

旨康熙二十六年四月二十三日題

特加太子少保巡撫直隸等處地方管轄紫荊等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹

題爲呈報事該 臣 看得直屬地方旗民雜處易於
藏奸 臣 設立保甲嚴飭所屬詳加稽察原期在
苻盡消地方寧謐以仰副

皇上靖盜安民之至意今據巡道僉事胡獻徵呈稱
有在監賊犯張五王四與張對亭等知身犯重

辟無計偷生乃暗伏杜六張三等在外傳通消息商謀反獄邀集夥黨希虎山等前來接應因希虎山等屆期未到遂謀令杜六張三等於康熙二十六年五月十三日夜二更時分舉火外應張五張對亭等各在司縣各監放火希圖乘間脫逃旋被夥賊殷一贊殷得奇出首提拿各犯研訊俱供認情真詳請行提張五等供出各犯究審等情前來查張五等所供希虎山董二等二十餘人多係巨窩積盜竟敢結夥多人謀來郡城接應反獄真胆大包天目無三尺者也此輩窩盜爲盜流毒地方應亟爲嚴究剪除則盜賊易於消弭地方亦得寧謐除希虎山一犯已據通州獲解併張對亭子張三供出接應反獄之李崑山等在獻縣等處嚴行緝拿外查董二等多屬旗人而潛藏

京城未便徑爲拿究相應

題請

勅部將各犯行提發臣究訊定案理合具

題伏乞

睿鑒施行臣未敢擅便謹

題請

旨康熙二十六年五月十九日題 月 日奉

旨據奏賊犯張五等暗伏杜六等在外傳通消息邀
集夥黨董二等商謀反獄且董二等潛藏京城勾

連賊黨大干法紀該部速行嚴拿押發究訊定擬
具奏該部知道



